



UNIVERSITÄTS-
BIBLIOTHEK
PADERBORN

Universitätsbibliothek Paderborn

Historiae Ecclesiasticae Pars ...

Historiae Ecclesiasticae Pars Secvnda, Qva Continentvr Socratis Scolastici
Constantinopolitani lib. 7. Theodoriti Cyrensis episcopi lib. 5

Christopherson, John

[Köln], 1569

Pluribus verbis scriptor hic Theodosii iunioris mansuetudinem extollit. Cap.
XLI.

urn:nbn:de:hbz:466:1-12704

SOCRAT. HISTOR.

frequentauit, Rhetoricæque studiose operam nauauit. Qui cum ad ætatem virilem perueniret, multum cum episcopo Attico versatus est, illiusque scriba fuit. Quem in literis & virtute admodum proficientem Atticus ad gradum diaconatus euexit. Ac cum presbyterij honore dignus putaretur, a Sisinnio, vt supra demonstraui, ad episcopatum syzici designatus est. Sed hæc iam ante factitata erant. Id temporis verò sedem episcopalem ecclesiæ Constantinopolitanæ obtinuit. Vir erat morum probitate præter cæteros eximius. Quippe institutus ab Attico, omnes eius virtutes sedulo imitatus est. Tolerantiam qua etiam Atticus præditus fuit, multo magis quàm Atticus excoluit. Nam Atticus cum tempus postularet, hæreticis terrorem incussit: Proclus omnibus se mansuetum, & facilem præbuit, hæcque ratione multo citius, quàm vi eos ad ecclesiam traductos fore præuidit. Nam nullam sectam vexare instituit, sed illustre mansuetudinis decus quod ecclesiæ conuenit integrum seruauit, ei que reddidit. In qua re Imperatoris Theodosij exemplum secutus est. Nam vt illi visum fuit contra eos, qui rei agebantur, minimè authoritatem Imperatoriam exercere: ita Proclo eorum nullam prope rationem ducere, qui ab eo diuersam de Deo doctrinam amplectebantur.

Pluribus verbis scriptor hic Theodosii iunioris mansuetudinem extollit.

CAP. XLI.

PORRò autem Theodosius Imperator Proclum ob hanc causam, quam dixi, multum probauit. Nam eos qui sunt verè sacerdotes patientia exæquauit, nec illos, qui persequendi studio ducebantur, vlllo modo probare potuit: imò verò dicam audacius, Omnes qui verè sacerdotes sunt mansuetudine superauit, sicut libro Numerorum de Moyse loquitur: Erat Moyse vir mitissimus, super omnes homines, qui morantur in terra. Idem ipsum de Theodosio Imperatore iam dici potest, quod super omnes homines, qui morabatur in terra sit mitissimus. Propter quam quidem

Num. 12.

quidem mansuetudinem Deus hostes illius sine præliorum certaminibus ei subiugavit : sicut tum trophæa contra Ioannem tyrannum statuta, tum clades Barbarorum, quæ post consecuta est, euidenter ostendit . Nam Deus talia beneficia in hunc sanctissimum Imperatorem contulit, qualia in eos, qui olim iustitiam in vita diligenter colebant, contulerat. Atque certè non assentandi studio impulsus hæc scribo, sed reuera ita se habere omnibus deinceps perspicuè declarabo.

Quas clades barbari sustinuerint, qui Ioanni tyranno opitulati sunt. CAP. XLII.

POST tyranni necem, Barbari, quos ille ad auxilium sibi contra Romanos ferendum accersuerat, in fines imperij Romani incursionem facere constituerunt. Quo audito Imperator uti solet, istarum rerum curam Deo commendauit, atq; precibus se totum dedens, breui, quod in optatis erat, est consecutus. Quibus autem cladibus barbari opprimerentur, non incommodum est hoc loco recensere. Primum illorum dux, nomine Rugas fulminis iactu interiit, Deinde pestis subsecuta, maximam partem hominum qui ei parebant, è medio sustulit. Neque hoc satis esse videbatur, sed ignis etiam de celo delapsus, complures eorum qui supererant, absumpsit. Quæ res Barbarorum animis maximum iniecit timorem, non tam propterea quod contra bellicosam Romanorum gentem arma ferre ausi fuissent, quàm quòd Romanos à Deo præpotenti adiutos animaduernerent . Eodem tempore Proclus episcopus prophetiam quandam ex Ezechiele petitam in ecclesia docuit, eamque præclare ad salutem iam tum Romanis à Deo datam non sine maxima omnium commendatione accommodatit . Prophetia autem hæc est . Tu fili hominis vaticinare super Gog, principem Rhos, Misoch, & Thobel. Iudicabo eum morte & sanguine, & pluuiâ inundanti, & lapidibus grandinis : & ignem & sulfur pluam super eum, & super omnes qui sunt cum eo, & in gentes multas cum eo, & magnificabor, & glo-